

## COMPARCENCIA A PETICIÓN PROPIA DO DIRECTOR XERAL DE RELACIÓN EXTERIORES E COA UNIÓN EUROPEA PARA DAR CONTA DO INFORME ANUAL DA LEI DE ACCIÓN EXTERIOR DE GALICIA

Parlamento de Galicia, 19 de xaneiro de 2022 ás 10:30

Moitas grazas señor presidente,

Bos días señorías,

Grazas pola oportunidade de comparecer hoxe para dar conta das viaxes oficiais fóra de Galicia das autoridades autonómicas. Fágoo por vez primeira ao abeiro da nova *Lei 10/2021, do 9 de marzo, reguladora da acción exterior e da cooperación para o desenvolvimento de Galicia*. Unha Lei que debería marcar un antes e un despois da nosa acción exterior, e faino ademais coa meirande blindaxe xurídica posible, ao non exporse reparo algúns á mesma pola Administración Xeral do Estado, segundo o criterio do Ministerio de Asuntos Exteriores, Unión Europea e Cooperación (MAEUEC).

Esta nova Lei foi publicada no Diario Oficial de Galicia do 15 de marzo de 2021, entrando en vigor aos vinte días da súa publicación. Polo tanto, aínda non se cumpliu un ano completo do seu despregue, pero estimamos que sendo o 2021 un período de transición cómpre non adiar esta comparecencia en aras á maior transparencia e inmediatez. Nos vindeiros meses, dado que xa



tivemos unha primeira xuntanza do Consello de Acción Exterior, celebrado o pasado 14 de decembro na sé do Consello Económico e Social, esperamos poder dispor da nova Estratexia de Acción Exterior (EGAEX), que abranga o lustro 2022-2026. Daquela, tamén daremos conta do que prevé o artigo 14.2 da Lei, enlazando dese xeito o tránsito da anterior EGAEX á nova. Con todo, do que lles vou expoñer xa se pode inferir de xeito nido un balance preliminar do despregue da actual EGAEX, aínda que esta tivera sido notablemente afectada pola incidencia da pandemia, e co fin de garantir a correcta transición entre a Estratexia previa e a nova, que terá como horizonte o 2027, en liña cos parámetros legais agora vixentes.

Como é doado comprender, o impacto da COVID-19 alterou por completo tanto o desenvolvimento da vixente EGAEX como a previsión de desprazamentos ao exterior das autoridades galegas. Tivemos pois que adaptarnos a unha nova realidade, tan dura e cruel como imprevisible e variable, do mesmo xeito que o fixeron todas as Administracións Públicas, Estados e Organizacións internacionais, comezando pola Unión Europea. En troques xurdiron novos modelos de interacción co exterior para nos adaptar axiña a esta case distópica realidade, como foi o caso das videoconferencias, as conferencias virtuais multilaterais, e o maior uso das comunicacións telefónicas e do correo electrónico.



A situación pandémica xeralizada e as consubstanciais restricións por mor da saúde pública, impuxéronse nesta normalidade anómala á que nos tivemos que afacer. Deste xeito, non quedou outra alternativa que nos adaptar a este entorno hostil e restritivo, aproveitando as xanelas de oportunidade que a evolución do andazo abría nos distintos territorios.

Con estes condicionantes de forza maior, que explican o contexto no que nos tivemos que mover e convivir coas autoridades de fóra implicadas, inicio a miña exposición detallada seguindo a orde protocolaria concorrente.

Comezo polo Presidente da Xunta de Galicia, que se desprazou a Lisboa o 27 de maio xunto co Vicepresidente Primeiro, para se reunir co Presidente da República Portuguesa, Dr. Marcelo Rebelo de Sousa, reeleito para un segundo mandato o 24 de xaneiro de 2021. Este encontro dá fe abonda da gran estima mutua que a República Portuguesa ten por Galicia e que Galicia ten con esta República veciña e irmá. Ao longo da entrevista, o Dr. Rebelo de Sousa dou mostras do rico coñecemento que posúe sobre a situación española en xeral e a galega en particular.

O Presidente da Xunta expuxo nese encontro a oportunidade que supón o Xacobeo 21-22 para reactivar o turismo e a economía de ambos os territorios, agradecéndolle ao tempo a decisión persoal do Presidente da República Portuguesa de realizar unha etapa do Camiño como peregrino, e que tivo amplio eco alén o Miño.



Asemade, o Presidente galego valorou moi positivamente o apoio do Presidente portugués ao eixo atlántico ferroviario e o seu compromiso inequívoco para que a conexión Porto-Vigo non teña marcha atrás.

Tamén lle dou conta dos proxectos para os Fondos *Next Generation*, que resultan interesantes para a Eurorrexión Galicia-Norte de Portugal, Eurorrexión que aspira a un maior grao de integración que calquera das súas homónimas da Unión Europea.

De seguido reuniese co Primeiro Ministro da República Portuguesa, Sr. António Costa. Con el, o Presidente da Xunta subliñou que o compromiso de Portugal co AVE Vigo-Porto é un importante acicate para que o Goberno de España priorice definitivamente unha infraestrutura estratégica para ambos países e para a UE no seu conxunto. Tamén trataron sobre os fondos europeos, salientando o proxecto relacionado coa automoción que ten presentado a candidatura galega, ademais de avaliar as sinerxías que neste eido poden desenvolver Galicia e a Rexión Norte de Portugal. Neste punto, lembraron que a nosa Eurorrexión ten acadado 163 millóns de euros nas últimas convocatorias do POCTEP e confirmaron que xa está a traballar en novos proxectos. Por último, abordaron a situación que atravesa o turismo e as oportunidades conxuntas que implica a extensión do Xacobeo 21-22.



En resumidas contas, estimamos que esta viaxe acredita o altísimo nivel de cooperación que mantemos non só coa Rexión Norte de Portugal, senón mesmo coa República Portuguesa e, por extensión súa, coa Lusofonía. Esta cooperación fica plenamente asentada e está totalmente institucionalizada, con independencia das distintas cores políticas das autoridades e entidades implicadas. Por conseguinte, esperamos que así prosiga logo das eleccións lexislativas do vindeiro 30 de xaneiro.

O 14 de xuño de 2021, o Presidente da Xunta foi recibido en audiencia no Vaticano polo Papa Francisco. Alí agradeceulle a extensión do Ano Santo de 2021 ao 2022 e convidouno a visitar Galicia, como xa fixeran outros Pontífices, sendo o caso de Xoán Paulo II -co gallo do Ano Xubilar de 1982- e de Benedito XVI en 2010.

O 16 de novembro, o Presidente desprazouse a Bruxelas, ao que acompañei, onde se reuniu con diversas autoridades da Unión. Comezando polo Sr. Marc Lemaître, Director Xeral de Política Rexional dende 2016, verdadeiro arquitecto desta política europea, co que tratou os asuntos galegos de maior relevancia nos eidos da súa responsabilidade.

De seguido reuniese coa Vicepresidenta para a Democracia e a Demografía da Comisión Europea, Sra. Dubravka Šuica, coa que tratou a posta en marcha da Lei de Impulso Demográfico de Galicia, recoñecida coma pioneira en Europa, e iniciativas como a Tarxeta Benvida e a gratuidade das escolas infantís. Nesta orde, a



Vicepresidenta Šuica fixo fincapé no interese da estratexia demográfica galega e na posibilidade de presentala noutros territorios da UE en tanto que modelo a seguir.

Tamén se reuniu o Presidente da Xunta co Comisario de Emprego e Dereitos Sociais, Sr. Nicolas Schmit, co que tratou da Axenda galega de emprego, que se presentará en xuño de 2022, co obxectivo de sincronizar a oferta coa demanda de postos de traballo, o que permitirá incrementar a nosa taxa de ocupación e reducir o desemprego.

Finalmente, o Presidente galego mantivo unha xuntanza co Alto Representante para Asuntos Exteriores e Política de Seguridade, e ao tempo Vicepresidente da Comisión Europea, Sr. Josep Borrell. A maior parte do tempo deste encontro ocupouse na exposición da situación que están vivindo as industrias galegas ante os problemas derivados da crise enerxética, e da necesidade de que a Unión adopte un enfoque estratégico mundial para garantir o seu fornecemento e reforzar a competitividade da nosa industria, sen esquecer a protección de cidadáns europeos -nomeadamente dos galegos- en escenarios inestables.

Asemade, o Presidente aproveitou a viaxe institucional a Bruxelas para promocionar o Xacobeo 21-22, coa realización dun seminario no que intervino telemáticamente o Vicepresidente da Comisión Europea, Margaritis Schinas e no que a Presidenta da



Comisión Europea, Ursula von Der Leyen, enviou un vídeo animando a facer o Camiño de Santiago neste Ano Santo.

A maiores, o Presidente participou o 10 de maio en Porto nos Diálogos Gallaecia, xunto co Presidente da Cámara Municipal, Sr. Rui Moreira. Alí, o Presidente galego Feijóo referiuse á oportunidade que supón o Corredor Atlántico ferroviario para reforzar a capacidade loxística do córner do noroeste peninsular, coas conexións ferroviarias a Punta Langosteira, xa encamiñada, e a saída Sur de Vigo, cuxo estudo para valorar as distintas alternativas vén de ser licitado. Avogou así por que os Gobernos de España e Portugal prioricen dentro dos fondos europeos as conexións ferroviarias da fachada atlántica, claves para a competitividade da Eurorrexión Galicia-Norte de Portugal.

Asemade, o 29 de xuño en Vilanova da Cerveira, o Presidente asistiu a clausura do Encontro de Cooperação Transfronteiriça, acompañado da Ministra portuguesa da Coesão Territorial, Sra. Ana Abrunhosa, e do Presidente da Comissão e Desenvolvimento Regional do Norte, Sr. António Cunha. Outra volta, cando se trata de asuntos de cooperación transfronteiriza no ámbito da nosa Eurorrexión, ao noso criterio resulta algo forzado cualificar os correspondentes desprazamentos como "vías ao exterior". Igual sucede coas asistencias do Vicepresidente Primeiro a Porto, o 28 de setembro, e a Lisboa o 30 dese mesmo mes, xunto coa Directora da



Axencia de Turismo, co gallo da proxección e promoción do Xacobeo 21-22.

Pola súa banda, a Conselleira de Medio Ambiente, Territorio e Vivenda asistiu do 6 ao 8 de novembro a Glasgow por mor da Cimeira do Clima, é dicir, da xuntanza inserida no 26º período de sesións da Conferencia das Partes (COP 26) na Convención Marco das Nacións Unidas sobre o Cambio Climático (CMNUCC). A conselleira asinou en representación da Xunta o Memorando de Entendemento Under2 2021, en virtude do que todos os asinantes asumen o reto de implementar, de forma coordinada, as medidas e actuacións necesarias para limitar o quecemento global. Galicia comprometeuse no marco da COP26 a traballar para reducir as súas emisións de gases de efecto invernadoiro co obxectivo de contribuír a manter o aumento da temperatura media global por baixo dos 2°C ao final deste século, pero co obxectivo de que non supere os 1,5°C na medida do posible.

Tamén se desprazou do 21 ao 23 dese mesmo mes a Copenhague coa Directora xeral de Ordenación do Territorio e Urbanismo, convidadas xunto a un grupo de institucións pola Embaixada de Dinamarca, o que lle permitiu coñecer de primeira man algúns dos proxectos e iniciativas máis relevantes impulsados polas administracións públicas danesas nos últimos anos en materia de eficiencia enerxética e a partir da aplicación de modelos construtivos sostibles. Así visitaron o Centro danés de arquitectura



e alí apostou pola rehabilitación enerxética das vivendas mediante modelos de construcción sostibles e eficientes, e agradeceu á Embaixada danesa o convite, subliñando os vínculos establecidos coas autoridades dese país e con empresas punteiras en eficiencia enerxética. Igualmente aproveitou para indagar no modelo danés de xestión de residuos e explorar unha posible cooperación galaico-danesa neste eido.

O conselleiro de Educación, Cultura e Universidade viaxou o 3 de xuño de 2021 a París co Director Xeral de Patrimonio Cultural, onde se reuniron co Embaixador de España perante a UNESCO, a fin de tratar a presentación da candidatura da Ribeira Sacra ao Comité do Patrimonio Mundial da Unesco. O 19 de abril participou na inauguración en Braga da VI Capital da Cultura do Eixo Atlántico, a onde volveu o 1 de setembro para participar no relatorio inaugural do XVI Congreso Internacional Galaico-Portugués de Psicopedagogía, centrándose na experiencia da xestión do pasado curso académico no entorno da COVID-19.

Para pechar a exposición de desprazamentos exteriores dos integrantes do Consello da Xunta, cómpre sinalar que a Conselleira do Mar estivo en Bruxelas do 21 ao 24 de marzo de 2021 e do 11 ao 14 de decembro, así como do 27 ao 29 de xuño en Luxemburgo, para asistir ás respectivas sesións do Consello de Pesca da UE. Do 29 de novembro ao 1 de decembro tamén estivo en Bruxelas para se reunir coa Directora Xeral de Asuntos Marítimos e Pesca e con



representantes doutros departamentos da Comisión Europea. Alí lles trasladou que a frota galega deixaría de ser rendible coa posible eliminación das bonificacións aos combustibles na pesca, opoñéndose en consecuencia a esa lesiva medida.

Á marxe destas xestións no eido da UE, a Conselleira do Mar estivo do 24 ao 26 de outubro en Milán para acompañar ás empresas marítimo-pesqueiras galegas no certame agroalimentario *Tutto Food* alí celebrado, amosando a apostase pola promoción exterior da nosa cadea mar-industria. Por último, o 19 de novembro visitou en Lisboa o Instituto Portugués do Mar e da Atmosfera, xunto coa Directora do INTECMAR, coa finalidade de estreitar lazos e intercambiar experiencias para reforzar o control de moluscos bivalvos.

Nun chanzo protocolario inferior, é dicir de secretarios, directores xerais e asimilados, o Secretario Xeral de Emigración estivo do 26 ao 28 de novembro en Xenebra e Lausanne, assistindo á clausura a exposición "*Acollida e hospitalidade no Camiño de Santiago*", organizada pola Sociedade *A Nosa Galiza*. De seguido desprazouse a Montevideo e Bos Aires ata que regresou a Zurich, do 30 de novembro ao 5 de decembro. Por vez primeira desde que empezou a pandemia puido visitar esas colectividades uruguaias e arxentinas. Reuniuse co Embaixador de España no Uruguai e co Conselleiro de Traballo, Migracións e Seguridade Social da Embaixada. Tamén se reuniu co Ministro de Educación e Cultura, Sr.



Pablo da Silveira. Asemade trasladoulle á Cónsul xeral de España en Uruguai a importancia da colaboración entre administracións para facer más efectiva a atención á colectividade galega e as políticas de retorno. En Uruguai aproveitou a viaxe para asistir co Director do Centro Dramático Galego á representación da obra "*O charco de Ulises*". Xa en Zurich asistiu aos actos do 40 aniversario da asociación cultural *As xeitosiñas*.

En resumo, o Secretario Xeral centrou a súa viaxe a América en buscar estímulos, conxuntamente coas entidades galegas, para a recuperación das actividades coa colectividade. Deste xeito afirmou en Bos Aires que a pandemia fixo aflorar as fortalezas do traballo en común de entidades e Administración, a prol dos galegos alí residentes. Nestes actos sempre aproveitou para presentar o balance da Estratexia Retorna e máis as distintas liñas de axuda aos galegos do exterior durante o exercicio 2022.

A Directora de Turismo de Galicia viaxou a Italia o 10 de outubro para asistir coa Ministra de Industria, Comercio e Turismo á inauguración do Centro Multimedia Interactivo da Praza de España en Roma. Logo, do 9 ao 11 de novembro, realizou dúas presentacións en Roma e Milán, co propósito de internacionalizar a celebración do Xacobeo 21-22 e reactivar a chegada de peregrinos e viaxeiros italianos neste ano 2022.

Pola súa banda, o Director xeral da Fundación Semana Verde viaxou do 10 ao 12 de novembro a Irlanda, para asistir á asemblea



da Asociación Europea de Mercados de Bovino, dado que é vicepresidente da súa xunta directiva.

O Director do IGAPE desprazouse a México do 19 ao 26 de novembro. O seu obxectivo foi abrir novas posibilidades de negocio ás empresas galegas, participando nunha misión plurisectorial no marco do Plan FOEXGA, que impulsa o Goberno galego en colaboración coas cámaras de comercio para favorecer a internacionalización de PEMEs e autónomos. Alí tamén visitou a Antena do IGAPE, que ata o momento, cooperou con máis de 400 empresas galegas na consolidación dos seus proxectos neste país. México supón nestes momentos o primeiro destino das exportacións galegas a Latinoamérica e o sexto país máis importante fóra de Europa. Neste senso, durante os nove primeiros meses do ano, as exportacións galegas a México ascenderon a cerca de 159 millóns de euros, o que supón un 30,8% máis con respecto ao mesmo período do ano precedente. Nesta viaxe, o director do IGAPE reuniuse con empresas galegas con filial en México, como Ramón García -adicada ao contract e implantada en Querétaro-, Cortizo e Malasa Mex Contract, e con representantes de Redegal e Valora. No marco do Plan Foexga, a Xunta ten impulsado outras misións comerciais en México, en sectores como o da alimentación, as TIC, ou o téxtil, das que se beneficiaron máis dun cento de empresas galegas. Agora o Foexga busca adaptarse á situación do comercio derivada da pandemia.



A Directora Xeral de Calidade Ambiental, Sostibilidade e Cambio Climático desprazouse a Bruxelas do 15 ao 18 de novembro para participar no Taller *HCH in Europe*, onde abordou a incidencia do lindano, e mantivo reunións con representantes da DG ENVI, abordando a estratexia de solo san e o Regulamento Aarhus.

Entre o 16 e o 19 de novembro, o Director do Instituto de Estudos do Territorio viaxou a Bélgica para recabar fondos europeos que financien o proxecto "*Biogov*" de protección da biodiversidade, unha iniciativa que aspira a liderar a partir do vindeiro exercicio, facendo balance dos catro primeiros anos da iniciativa.

O presidente de SOGAMA estivo o 3 de decembro en París, para recoller o premio *European Business Awards 2021*, polo seu compromiso medioambiental, cualificándoa como exemplo de economía circular na xestión medioambiental.

O Director da Axencia Galega de Calidade Alimentaria foi a Roma do 6 ao 10 de outubro, reuníndose co presidente da Asociación Italiana de Agricultura Biolóxica (AIAB), co que estudou vías de colaboración para impulsar estas producións. Ademais, tamén mantivo unha xuntanza coa representante do colexio de enxeñeiros agrónomos da rexión da Lazio e visitou diversos centros de comercialización e mercados de produtos ecolóxicos e de proximidade.



A Presidenta de Portos de Galicia viaxou a Southampton o 16 de novembro para asistir ao *Boat Show* coa proposta "*Galicia Destino Náutico: O Camiño por Mar*", e o 29 de novembro a La Rochelle para participar no *Grand Pavois* e tamén presentar a devandita iniciativa turística.

Polo que a mi mesmo respecta, tiven que desprazarme a Bruxelas en diversas ocasións para atender obrigas vincelladas a traballo na Fundación Galicia Europa, a atender diversas comisións e ao Pleno do Comité das Rexións. Para o caso do Pleno de decembro debo subliñar a presencia do Presidente da República Francesa, Emmanuel Macron, que agora exerce a Presidencia de quenda da Unión, xunto co Comisario de Emprego e Dereitos Sociais, Nicolas Schmit. Alí aproveitei para propor a creación dun marco normativo e financeiro que englobe todas as actividades da economía azul e que asegure a compatibilidade da acuicultura coa pesca tradicional e o marisqueo. A maiores, o 24 de setembro tivemos reunión do CdR en Eslovenia, e o 10 de decembro tiven que asistir a Roma na xuntanza da comisión CIVEX para tratar da necesidade de ampliar as liñas de cooperación cos veciños do sur do Mediterráneo e singularmente da cooperación con Libia, de acordo coa *Iniciativa Nicosia* do Comité das Rexións.



## **RECEPCIÓNS DE DELEGACIÓNS DO EXTERIOR**

Rematada a relación de viaxes de directores xerais e asimilados alén do espazo eurorexional, á vista do novo marco xurídico inaugurado pola nosa *Lei 10/2021, do 9 de marzo, reguladora da acción exterior e da cooperación para o desenvolvemento de Galicia*, procede agora dar conta dos restantes contactos institucionais mantidos polas autoridades autonómicas con representantes de organizacións internacionais, da Unión Europea e doutros Estados. A este respecto lembremos que a acción exterior tense diversificado nas súas modalidades durante os últimos anos e máis intensamente coa pandemia por todos padecida, polo que atendendo ao espírito e á letra da Lei cómpre informar destes contactos, consonte co termo “*recepcións*” inserido no seu artigo 21.

Así, o Presidente da Xunta recibiu en Galicia ao Vicepresidente da Comisión Europea, Sr. Margaritis Schinas e ao Comisario Virginijus Sinkevičius.

Este último, responsable de Medio Ambiente, Océanos e Pesca da Comisión Europea, departiu co Presidente da Xunta o 20 de setembro, estando acompañado polo Ministro de Agricultura, Pesca e Alimentación, Sr. Luís Planas. Deste xeito, o Presidente lembroulle ao Comisario lituano as principais demandas galegas, entre as que salientou un marco comercial equilibrado e o cumprimento das normas no mercado internacional; a



sustentabilidade da pesca; a súa adaptación ao cambio climático e á alimentación segura e de calidade; e a necesidade dunha ccoobernanza global para loitar contra a pesca ilegal.

Asemade, recordou que o Goberno galego xa está a traballar co Consello Galego de Pesca para fixar a postura da Comunidade Autónoma na defensa dos seus intereses. Ademais do impacto do Brexit, ambos os dous falaron tamén da necesidade de que o futuro regulamento de control pesqueiro teña en conta as particularidades da pesca artesanal galega.

Sendo Virginijus Sinkevicius unha das autoridades europeas de referencia na implantación do Pacto Verde, o responsable do Goberno galego resaltou a oportunidade que neste eido supoñen os fondos europeos *Next Generation*, para os que Galicia ten presentado candidaturas con proxectos solventes, que teñen na sostibilidade un eixo clave, como a iniciativa *AutoÁncora* ou a estratexia de *Crecemento Azul* desenvolvida co Porto de Vigo.

Así mesmo, expuxo o interese da Comunidade por impulsar a xestión sostible dos bosques, a través dun proxecto integral que persigue activar áreas forestais que actualmente non son explotadas; previr os incendios forestais e loitar contra o cambio climático; diversificar o monte aumentando a presenza das especies autóctonas; incrementar a creación de valor das cortas; e investir na reciclaxe a gran escala de residuos téxtils para producir fibras celulósicas sustentables.



O Vicepresidente Schinas, responsable da área de Promoción do xeito de vida europeo na Comisión europea, visitou Galicia e o Presidente da Xunta aproveitou para transmitirlle as prioridades galegas no seu eido de competencias, sinalándolle a relevancia que para nós ten incentivar o retorno dos cidadáns galegos asentados fóra, tendente a mellorar as nosas perspectivas demográficas, o que resulta un reto común para toda a Unión, como así recoñeceu o responsable grego.

De singular relevancia foi a visita do Presidente de Colombia a Galicia, o 18 de setembro. Con el mantivo unha xuntanza de traballo na que salientaron as oportunidades mutuas de Galicia e Colombia en sectores como o pesqueiro, o naval, o *contract*, o TIC e o forestal. Dende a parte galega subliñouse a transcendencia do noso sector naval, que xa ten traballado en Colombia. De igual maneira lembrou que no sector do *contract*, as compañías galegas xa tiñan desenvolvido proxectos de relevancia. No que se refire ao sector TIC, puxo como exemplo a tecnoloxía sanitaria galega, con iniciativas como a historia clínica, a receita electrónica ou a tarxeta sanitaria, nas que o Goberno de Colombia amosou o seu interese.

No referido ao sector pesqueiro, o presidente sinalou as oportunidades que se poden crear entre Galicia, unha potencia da Unión Europea en pesca e conservas, e Colombia, con gran potencial neste eido por ser un país bañado polo Atlántico e o Pacífico.



Así mesmo, o titular da Xunta de Galicia lembrou as opcións de colaboración na industria forestal. Nesta liña, subliñou que se trata dunha industria importante na nosa comunidade e que se poden crear sinerxías agora que Colombia conta con moitos proxectos forestais e tamén diversas iniciativas enerxéticas renovables. Ademais, abordaron as posibilidades de cooperación no eido cultural, e máis concretamente na coprodución audiovisual, así como nos intercambios universitarios.

O Presidente galego manifestou que o obxectivo da Xunta é seguir internacionalizando a nosa economía, e acadar en 2025 canda menos 8.000 empresas exportadoras para así chegar aos 25.000 M€ de exportacións anuais. Neste senso, subliñou que Colombia ocupa xa o oitavo posto nas exportacións que Galicia realiza a América Latina.

Nesta nova realidade que nos toca vivir por mor da pandemia, cómpre engadir que o Presidente da Xunta participou o 27 de outubro nun Foro impulsado polo Consello de Europa, para intervir nun debate sobre emigración. Nel, o Presidente lembrou a necesidade que ten Europa de abordar o retorno dos europeos que así o desexen e planificar as migracións precisas para afrontar as consecuencias do avellentamento, que xa se observan en toda a Unión. Neste senso, postulou por actualizar el sistema de homologación de títulos; axilizar o acceso á nacionalidade e



outorgar con máis rapidez permisos de residencia a cónxuxes, fillos e outros familiares.

Asemade, Galicia acolleu o XXVI Plenario do Círculo de Montevideo, no que participaron autoridades de gran talla internacional como os ex Presidentes Ricardo Lagos, de Chile, Julio María Sanguinetti, do Uruguai, e Felipe González, así como empresarios, sinaladamente o investidor mexicano Carlos Slim. Neste Foro, o Presidente da Xunta expuxo as prioridades de Galicia de cara á recuperación económica logo do impacto da pandemia.

No tocante ás relacións co corpo diplomático, debemos salientar mais dunha quincena de visitas de embaixadores para reunirse co Presidente da Xunta.

Pola súa banda, o Vicepresidente Primeiro da Xunta reuniuse o 17 de xuño co Ministro de Turismo de Corea do Sul, Sr. Hwang Hee, co gallo do *Spain Korea Roundtable*, inaugurada polo Presidente surcoreano, Sr. Moon Jae-in, e coa asistencia da nosa Ministra de Industria, Comercio y Turismo. É ben sabido o grande interese que Galicia en xeral, e o Camiño Xacobeo en particular, teñen entre os cidadáns desa República asiática. Como acreditación baste con reproducir as palabras do seu Presidente, cando afirmou nese acto:



*Moitos coreanos queren facer o Camiño de Santiago. Un deles, Seo Myung-sook, peregrinou para reflexionar sobre a vida antes do seu 50 aniversario. Mientras camiñaba escoitoulle dicir a súa compaÑeira: "¿Por que non creas o teu propio camiño?" Inspirada, regresou a Corea e foi pioneira do Camiño Olle na illa de Jejudo. O Camiño Olle tense convertido nunha das rotas máis populares entre os coreanos (...)*

Deste xeito, vaise reforzando a proxección internacional de Galicia en rexións e países nos que ata hai pouco semellaba improbable. O éxito da nosa imaxe en Corea do Sul, un país extremadamente desenvolvido e competitivo que busca destinos para realizar investimentos industriais de tecnoloxía punta e alto valor engadido, é unha aposta na que cómpre perseverar para así diversificar os nosos mercados exteriores.

En definitiva, todas estas actuacións son plenamente incardinables na vixente Estratexia Galega de Acción Exterior, a pesares das imprevisibles consecuencias e impactos xerados pola COVID-19. Agora estamos iniciando a programación da nova EGAEX 22-26, que estará sometida á Lei 10/2021. Como lles adiantei, o pasado 14 de decembro xa celebramos unha primeira xuntanza do Consello de Acción Exterior (CAEX). Nela puidemos contrastar impresións con representantes sectoriais, empresariais, sindicais, universitarios, culturais, municipais e das ONGDs, entre outros. En



cuestión de meses é a nosa intención volver comparecer neste Parlamento para dar conta do balance da EGAEX saínte, detallando entón as actuacións institucionais indispensables, e tamén para considerar as achegas precisas, a fin de mellorar a proposta da nova EGAEX que se despregará ata 2026.

Daquela, sen outras consideracións polo de agora, fico ao seu dispor para atender as cuestións que estimen oportunas ao fío desta exposición que agora conclúo.

Moitas grazas.